

NOTA DE PRENSA

A Área Empresarial do Tambre inicia este ano o programa de fomento do emprendemento “Atrévete” cunha visita de estudantes do colexio Divino Maestro

Asistiron hoxe a unha charla sobre o mundo da empresa ofrecida polo secretario da Asociación, Ramón Lois, e visitaron a empresa Tórculo

Desenvólvese en colaboración coa Consellería de Educación, Universidade e Formación Profesional e forma parte do plan de emprendemento no sistema educativo de Galicia Eduemprende

Santiago de Compostela, 31 de xaneiro de 2020 (Vía Láctea Comunicación).- A Asociación Área Empresarial do Tambre (AAET) ten en marcha unha nova edición de “Atrévete a ter unha idea”, un programa de fomento do emprendemento que se desenvolve en colaboración coa Consellería de Educación, Universidade e Formación Profesional e que forma parte do plan de emprendemento no sistema educativo de Galicia Eduemprende.

O programa “Atrévete” inclúe a celebración dunhas xornadas de fomento do emprendemento para Educación Secundaria Obrigatoria dirixidas a alumnos de 1º e 2º curso da ESO, que se desenvolverán os venres pola mañá na sede da asociación ata o 15 de maio. O calendario de visitas escolares en 2020 comezou hoxe venres co colexio Divino Maestro de Santiago de Compostela. Un grupo de 20 alumnos e alumnas de 2º da ESO asistiron a unha charla informativa que impartiu o secretario da Asociación, **Ramón Lois**. Explicoulles como é o mundo empresarial, en que consiste ser empresario e outras cuestións relacionadas como o concepto de responsabilidade social. “Non fai falta unha gran idea, senón unha que sexa ben aplicada e levala á práctica” –destacou na súa intervención–. Trala charla, os estudantes visitaron as instalacións de Tórculo Comunicación Gráfica, empresa membro da Asociación Área Empresarial do Tambre situada na Vía Edison do polígono industrial.

Visitas ao Politécnico e un concurso sobre unha boa idea de negocio

Outra actividade paralela do programa “Atrévete” son as actividades de fomento do emprendemento para Educación Primaria, dirixidas a alumnado de 5º e 6º curso de Primaria. Estas sesións celebraranse os venres pola mañá, ata o 15 de maio, no CIFP Politécnico de Santiago de Compostela. Os alumnos visitarán o centro e asistirán a unha charla sobre os viveiros de empresas nos centros educativos impartida por representantes do Politécnico, e a outra sesión na que coñecerán diferentes experiencias emprendedoras en Santiago ofrecida por empresarios ou representantes da Asociación. E para pechar a actividade, os escolares visitarán as instalacións do Politécnico e do seu viveiro de empresas.

Ademais, este programa educativo centrado no emprendemento conta co concurso “Atrévete a ter unha idea”, na que os estudantes participantes deben buscar unha boa idea de negocio e desenvovela nunha redacción. O prazo para presentar as propostas estará aberto ata o 22 de maio. Premiaranse as dúas mellores ideas de 5º e 6º de Primaria e de 1º e 2º da ESO. Os gañadores recibirán de agasallo unha táboa dixital.

Para poñer punto final a estas xornadas e actividades de emprendemento, celebrarase en xuño un acto de clausura ao que estarán invitados representantes do mundo da empresa e da Administración educativa. Durante este acto, farase entrega dos premios do concurso.

NOTA.- Inclúe fotografía da visita dos alumnos do colexio Divino Maestro

SAÚDOS
PRENSA Área Empresarial do Tambre
981 55 44 07/ 698 137 890
www.poligonotambre.com/es